



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

Taoba Japan ato kilonser Abe
tepsetsangi tai nangzükogo

Aluyimertem nem sen crore
8,000 agüjatokogo: CM Fadnavis

VOL. XXIII ISSUE NO. 22 (ADOK 22) DIMAPUR RASEMNÜ (WEDNESDAY) MONGPUTENI (OCTOBER) 29, 2025 ₹ 5.00

Nov 14 nü Agri Expo nung Hornbill Prelude alitsü

Dimapur, October 28, 2025 (TYO): Department of Tourism-i Forerunners Foundation Nagaland den külemi yaritepa November 14 nü Hornbill Prelude ayonga amungtsü.

Iba sentong ya Agri Expo, Chumoukedima nung agitsü aser taküm December ita Hornbill Festival tongtiba osang prokshitsü atema agitsü ta tayongertemi ashi.

Iba sentong nung sobaliba senmang, saisapong, music aser fashion benjungtsü. Anüngdang cultural troupe competition, tug

of war, bamboo climbing, bamboo stilt race aser pork eating competition ayonga agitsü aser takoker nem senpet agütsütsü ta tayongertemisa metetdaksü.

Nikongdang shilem nung music aser fashion extravaganza alitsü aser idakji nüngtugu national aser international beauty queens & models-i shilem agitsü.

Iba sentong nungsa Nagaland music industry nung pioneers aser achievers nem tetushi agütsütsü ta tayongertemisa metetdaksü.

Centre-i Nagaland nem tzüme-tsüng atema Rs 202 crore agütsür

Guwahati, October 28, 2025 (Agencies): Union Home Ministry-i Nagaland nem State Disaster Response Fund (SDRF) kübok Rs. 202 crore agütsüogo.

Iba ya instalment tanabuba lir aser iba Nagaland nung taküm tzüngluruwa mapang tzünglu kanga aruba, ajungben tzüme-tsüng timtem ajuruba aser anentsüh lendong balala atema teyari agütsüba lir.

Item senotsü ya Union Home Minister Amit Shah-i mulunga agizükogo aser 2025-26 financial allocation nung shilem ka lir. Nagaland nung disaster response & recovery measures tashi itdaksütsü atema iba teyari agütsür.

Tzüme-tsüng agi kongshia aliba tesemtem nung maparen inyakba nung mapang shitak nung senotsü teyari angutsü atema fund agütsüogo. Taküm financial year tsüngda Centre

sorkari SDRF aser National Disaster Mitigation Fund (NDMF) kübok state 27 nem Rs 15,554 crore aser tanga state 15 nem Rs 2,267.44 crore agütsüogo ta Union Home Ministry-i metetdaksü.

Lendong atalokba state tem dangi NDRF, Army, aser Air Force teams yoka yaritepogo ta parnokisa ashi.

"Prime Minister Narendra Modi aser Union Home Minister Amit Shah lenisüba kübok India sorkari alima lendongsüdong atalokdang state tem külemi yaritepa arur aser akokba teyari agütsür" ta Ministry-isa metetdaksü.

Taküm tzüngluruwa mapang NDRF-i state aser Union Territory 10 nung major operations 199 tashi agiogo. Iba mapang tzüme-tsüng aser anentsüh ajanga timtemer nisung meyrjang aika kümzükogo ta Ministry-isa ashi.

Manipur nung tobacco mesüra nicotine aliba products ajak noktanger

Imphal, October 28, 2025 (Agencies): Manipur sorkari state ajungalen Gutkha, Pan Masala aser tanga tobacco products yangluba, ayuba, alemba aser ayokba ajak noktango.

Küm ka atema tobacco mesüra nicotine aliba tobacco products ajak noktangtsü ta sorkari metetdaksü.

"Food Safety and Standards (Prohibition and Restriction on Sales) Regulations, 2011 aser Food Safety and Standards Act, 2006 nung ajemdaker iba tenokdangba agütsür. Iba sangdong ya tobacco-laced food products nungi public health kümzüka ayutsü atema agütsür" ta Commissioner of Food Safety and Commissioner-cum-Secretary (Health & Family Welfare) Sumant Singh-i ashi.

Iba tenokdangba kübok Gutkha, Pan Masala, Chaap Tobacco, Pure Tobacco, Khaini, Zarda, aser scented mesüra

flavoured tobacco ajak adener. Iba tetuyuba nungsa tobacco aser pan masala balala ayoker saka nisungtemi meyokteper achiba ajak dena lir.

Supreme Court-i 2016 nung Central Areca-nut Marketing Corporation vs. Union of India ken o atema tetuyuba agütsüba sülen Manipur sorkari iba tenokdangba agütsür.

State aser union territory temi tobacco aser nicotine adenba gutkha aser iba mesükba products noktangtsü atema mapa inyaksü ayongzüker ta Supreme Court-i ashi.

Iba mapa ya public health nung ajemdaker inyaksü aser aibelenertem Food Safety and Standards Act nung lateta aliba ama temerenshi alitsü ta Commissioner of Food Safety, Manipur-isa metetdaksüogo.

Iba sangdong agütsüba anogo nungi tenzüker küm ka atema Manipur ajungalen iba tenokdangba alitsü ta paisa ashi.

Nagaland nung PMAY-U kübok ki 30,000 shi yangluogo



Chümoukedima Town Council Hall nung Municipal Affairs & Urban Development Advisor Zhaleo Rio-i 2nd PM Awas Mela-Shehri sentong nung jembidang agiba noksa angur.

Dimapur, October 28, 2025 (TYO): October 28, 2025 nü Chümoukedima Town Council Hall nung Angikaar 2025 campaign kübok 2nd PM Awas Mela-Shehri ayonga agiogo aser küm 9 tashi iba scheme inyaka arudang Nagaland nung ki 30,000 jungnüa yangluogo.

Iba sentong ya Department of Municipal Affairs ajanga ayongzüker aser Pradhan Mantri Awas Yojana-Urban (PMAY-U) kübok maparen inyaka aruba osang lemsatepba den "Housing for All" alizüng ajungkettsü atema agi.

Iba sentong nung Municipal Affairs & Urban Development Advisor Zhaleo Rio-i o jembidang beneficiaries aser department nem tenüngsang agütsü.

Pradhan Mantri Awas Yojana-

Urban 2.0 ya PMAY-U scheme maneni inyakba scheme ka lir.

Jilatem nung poor aser middle class kibongtemi ki yanglutsü mesüra ki alitsü atema senotsü teyari agütsütsü nükjidong nung iba scheme tenzüker ta Advisor Zhaleo-i ashi.

Iba scheme ya küm 5 atema inyaksü. PMAY-U 2.0 kübok beneficiaries nem senotsü teyari Rs 2,50,000 agütsütsü tuogo. Iba ya installments asem lemsar agütsütsü aser senji Central sorkari 90% aser state sorkari 10% agütsür, ta paisa metetdaksü.

ULB councillors, ketdangpurtem aser Department ketdangsürtemi loktiliba nung tangar memenepertem ajungkettsü aser sorkar scheme balala osang prokshitsü ayongzüker ta Zhaleo-isa ashi.

Iba sentong nung paisa PMAY(U) beneficiaries nem Completion certificates agütsü.

Nagaland nung 2016 küm tenzükerba sülen küm 9 tashi nung Pradhan Mantri Awas Yojana-Urban (PMAY-U) scheme kanga junga inyaka arur ta State Mission Director PMAY-U & Additional Director (HoD) Directorate of Municipal Affairs, Temjenrenla Kechu-i ashi.

Iba mission kübok Nagaland kübok tesem balala nung ki 30,000 jungnüa yangluogo aser completion rate 96% shi lir. North East nung completion rates tajungtiba rongnung iba ya ka lir ta lai ashi.

Iba sentong nung Proprietor Elmechent, Chonben Yanthan-i innovative housing technologies aser PM Surya Ghar indang presentations sayu.

LBCA-i Pastors Conference bangzüng magizüker

Dimapur, October 28, 2025 (TYO): Lotha Baptist tsürtemi Roman Catholic nunger den kibalembu masütsüla ta Lotha Baptist Ekhumkho Pastorden Sanrhyu-i tawa lemtet ka agiba atema Lotha Baptist Churches Association (LBCA), Mission Centre Vankhosung-i osang jangjashitsüogo.

Iba lemtet nung LBCA shilem kecha mali aser Lotha Baptist Ekhumkho Pastorden Sanrhyu (Lotha Baptist Pastors' Conference) ya "unrecognised and unauthorized" ta LBCA Executive Secretary Rev Nyanchumo Lotha-i ashi.

LBCA den executive members, office bearers, aser

affiliated churches-i bangzüng pusema menungiter ta paisa ashi.

Balaka razüka aoba Baptist telok nungi Lotha Pastors' Conference-i tetuyuba agütsüba sülen manidaksü aser iba telok ka LBCA ajanga tentetba masü ta Rev Nyanchumo-isa ashi.

October 25-26, 2025 nung Old Ralan Baptist Church nung kümshia agiba LBCA Pastors' Conference agitsü sentong liasü. Ajisüaka unrecognized group-i tetsükdaksü agütsüba ajanga iba mungdang Totsü Baptist Church nung agitsü belen ta paisa metetdaksü.

Balaka razüka aoba telok nungi Pastor tem teloki mungdang balaka agi aser idangji iba

ashishitep aketba bangzüng renem ta Rev Nyanchumo-isa shisem.

Tayongzükbatem liaka Totsü Baptist Church nung Pastors' Conference takok ngua agiogo. Balaka razüka aoba telok ya Baptist denomination nung shilem ka ta asütsü makok kechiyong parnok ya LBCA nungi temelaba melii inyaksangshir ta paisa ashi.

LBEPS ya fellowship body ka dang lir aser Vankhosung nung aliba LBCA headquarters nungi temelaba magii ludentem tentettsü mesüra bangzüngtem renemtsü tashi kecha mali ta LBCA nung Executive Secretary Rev Nyanchumo-isa ashi.

FAC Mokokchung nung Santa's Workshop ayongzük



Dimapur, Mongputeni/Oct. 28 (TYO): Internal Quality Assurance Cell (IQAC) teyari nung Fazl Ali College, Mokokchung indang Eco Club-i college auditorium nung "Creating Joy the Green Way" omen kübok October 28, 2025 nü 6 buba Santa's Workshop ayongzuka liasü.

Sentong tenzüka Eco Club indang Convenor, Dr. Temjensangla Pongener-i SDGs den sendakteper libajen wazüka ayutsü atema

awareness agütsüsü club nükjidong aliba indang lemsatepa liasü.

Laisa bacthes balala nungi Eco Club alumni tem pela agizük, shirnok pei sempet lemsatepsü arua liasü, college alema oa iba club ya tesem ka nung külemi alir ama maneni ainba indang lemsatep.

Alumni nungi Chubatola-i iba club nung lai ajangshiba aser angazükba tem lemsatep.

Iba sülen workshop nunga learning stations asem - Waste

to Wonder Craft Station, Green Gift Wrapping Booth, aser Eco-friendly Christmas Décor - lemsar benjong mapang amshiba oset pei sasa yangluba indang sayu.

Item stations ya ano Christmas ki naro, snowflakes, naro talang, sempet talep, intricate crochets amala recycled oset nungi yanglutsü subcategories sadanga shilem agirtemi eco-friendly materials amshia osettsüset yanglutsü angazük.

Unified Art for Ability-One Heart, Many Gifts sentong ayongzük



Dimapur, Mongputeni/Oct. 28 (TYO): Government Primary School (GPS), PWD, Dimapur den lungjemer aser par teyari nung Special Olympics Nagaland (SON) ajanga October 28, 2025 nü GPS, PWD, Dimapur nung National Disability Employment Awareness Month (NDEAM) mezüngbuba munga Unified Art for Ability - One Heart, Many

Gifts sentong ayongzuka liasü.

Iba unified art competition nungya GPS kaketshirtem aser SON Special Athletes tem lungjemer Tsüngremi agütsüba sempet lemsatepa liasü.

SON nungi Tiaba Tzudir, Yantso Kikon aser Moatula nungeri mezüngbuba, tanabuba aser tasembuba sempet ngua liasü. GPS, PWD nungi Ngumi-i mezüngbuba, Ajenla-i

tanabuba aser Tsushila-i tasembuba jenjang ngutet. Par asemprong Class 1 nung azünger lir aser takok angur nem kulizüng kakets den sempetlep agüja liasü.

Government Primary School, PWD, Dimapur ajanga iba sentong sponsor asüba, temeim sayuba aser yaritepba atema pelaba lemsateper, ta SON sangdong ka ajanga ashi.

DGC kaketshir nem 'beauty & wellness course' kulizüng kakets agütsü



Dimapur, Mongputeni/Oct. 28 (TYO): Dimapur Government College indang Skill Development Committee ajanga ita ana "Beauty and Wellness Course" indang kulizüng kakets agütsüba sentong ka October 28, 2025 nü ayongzuka liasü.

Iba course atema senotsü teyari ya Directorate of Higher Education, Government of Nagaland nungi agütsü.

Iba beautician crash course indang tesayur Hukali Avito Swu-i iba course takok ngua agiba atema kaketshir nem

tenüngsang agütsü aser tanü tetoktepba agi sünger aliba putu nung 'self-employment' aser skill training indang tongmelang agi lemsatepa liasü.

Training agirtem tenüng nung Likusa, B.A. 1st Semester, English Honours ajanga college ketdangsür aser tesayur dang pelaba lemsatep.

Dr. Maongkala Longchar, Associate Professor, Department of English & Convenor, Skill Development Committee ajanga iba course agütsüba indang rateta jembidang Directorate of

Higher Education, Government of Nagaland dang pelaba shisema liasü.

Lai 'beauty and wellness industry' nung teimla tali akumba indang lemsatep aser kaketshirtem dang employment aser entrepreneurship atema skills tasen angazüka aliba amshitsü ajungshia liasü.

Training agir kaketshir 50 nem kulizüng kakets agüja liasü. Sentong nung menden Dr. G. Phukato Sema, Associate Professor, Dept. of Political Science liasü.

Mokokchung Police-i "Run for Unity" ayongzüksü

Dimapur, Mongputeni/Oct. 28 (TYO): Sardar Vallabhbhai Patel, Iron Man of India sor küm 150 ajungba bilemteta October 31, 2025 nü Mokokchung Police ajanga "Run for Unity" ayongzüksü.

Linük nung telungjem tanüla adokdaksütsü nükjidong nung iba sentong ya ayongzük. Iba den India linük lungjendaksüba aser linük telungjem tamendak dak akangshiba nung Sardar Ballabhbhai Patel-i shilem tulu agiba nüburtem nem bilemtetdaksütsü asoshi iba

sentong ya ayonger.

Iba Run for Unity ya anepdang 6:00 ako nung Ongpangkong BOC Point nungi tenzüksü aser Imkongmeren Stadium (Local Ground) nung tembangtsü. Shilem agitsüpur ajunga iba asemtep tenzüka tesem nung anepdang 5:45 tashinung adenshitsuila.

Iba sentong nung kaketshir, sorkar ketdangsür, NGOs, youth organization aser nübur ajunga arua shilem agitsü ayongzük, ta Mokokchung Police sangdong ka ajanga ashi.

Mkg. nung Chemist aser Druggist atema training ayongzük



Dimapur, Mongputeni/Oct. 28 (TYO): Mokokchung District nung aliba Chemist aser Druggist atema anogo ka training sentong CMO Conference Hall, Mokokchung nung October 27, 2025 nü Drug Control Administration, Office of the Chief Medical Officer, Mokokchung ajanga ayongzuka liasü.

Dr. Takosunep Ao, Dy. Chief Medical Officer, Mokokchung ajanga iba sentong ayongzükba nükjidong lemsatepa liasü.

Iba training nung ONDLS & NPPA, Combating antibiotics resistance through rational use of antibiotics, Effective drug storage: Safeguarding potency, safety and compliance aser

Pharmacist patients relation onüktem awajema liasü.

Kasa mapang Drug Control Officer, Tsunungrenla Jamir-i sentong nung shilem agirtem dang Central aser State Health services aser departments ajanga guidelines agütsüba ama tila tanur nem aket mozü kumdanga agütsütsü indanga shia liasü.

Iba training nung shisalen sayur ya Tsunungrenla Jamir, DCO; Imlisenla Kichu, Pharmacist, PHC Longsa; Nungshijungla Jamir, Pharmacist, IMDH aser Jongto Aier, District Pharmacy Officer nungertem liasü.

Iba training nung nisung 60 aden.

MCTE nung Green Audit Inspection cum Physical Verification ali

Dimapur, Mongputeni/Oct. 28 (TYO): Mokokchung district nung mezüngbuba Green Audit Inspection cum Physical Verification maparen Mokokchung College of Teacher Education (MCTE), Yimyu nung inyakogo.

Internal Quality Assurance Cell (IQAC), MCTE ajanga ayongzükba inspection ya Nagaland Pollution Board (NPCB) nungi Aghali A. Swu, Senior Environmental Engineer; Kevisede Pucho, Assistant Environmental Engineer aser Sentinaro Angami, Senior Scientific Assistant Scientific Assistant nungertemi agia liasü, kong Jubilee Memorial College nungi IQAC team dena shilem agi.

Sentong tenzüka IQAC Coordinator MCTE, Kerilhusa Peseyie-i pela agizükba o jembidang NAAC assessment nung Green Audit ya kanga tongtipang lir ta metetdaksü aser NPCB team aliba ajanga sustainable aser eco-friendly campus atema MCTE-i inyakba nung teyari tulu angutsü ta ashi.

MCTE Principal, Dr. T.

Alemla Longkumer-i iba sentong nung jembidang, libajen tebilemtsü tali akumba nung nüburtemi telangzüba kera magütsüba indang khuret lemsatepa liasü.

Green Audit ya institutional evaluation atema kisüng masü saka awareness agütsütsü aser libajen wazüka ayuba nung nübur ajungmesotsü hadir ka ama angatettsüla, ta ashi.

Technical session nung Aghali A. Swu-i Key Components, Methodology, Benefits of Green Audits for Colleges aser kakets reju teinyaktsütem indang osang lemsatepa liasü.

Lai tzü wazüka ayutsü aser ali rongsen kumdanga amshitsü nungdakba nenshia ashi.

Lai tzünglu tzü bendena ayutsü, groundwater recharge aser electricity kumdanga amshitsü ayongzuka liasü.

Iba sülen sentong nung shilem agirtem sensaksemba mapang liasü aser NPCB ajanga campus facilities physical verification oa college nung libajen wazüka ayutsü mapa balala inyakba repranga liasü.



Jammu and Kashmir nung tawa lendong balala atalokba ajanga 'humanitarian crisis' adokdaksüba atema sensaksemtsü asoshi BJP-i benokba Speaker Rahim Rather-i magizükba sülen J&K Assembly nung BJP MLA temi longkak aitba noksa nung angur.

Election Commission-i Prashant Kishor nem notice agütsü

New Delhi, Mongputeni/ October 28 (Agencies): Jan Suraa Party ngutetsang Prashant Kishor Bihar aser West Bengal naprongla nung voter ama züngoksemer aliba atema Election Commission of India (ECI) Mongolbarnü pa nem notice ka agütsüogo.

Indian Express nung sangdong ka ajanga ashiba agi, Prashant Kishor indang tenüng ya West Bengal aser Bihar naprongla indang electoral rolls nung adoker. Poll strategist aliba nungi politician akümsang, shir party Bihar assembly election nung tokteptsü lir, pa ya Kolkata nung 121 Kalighat Road nung züngoksema lir, koba chief minister Mamata Banerjee indang Bhabanipur constituency nung Trinamool Congress office address lir.

Iba osang dak ajemdaker ECI-i ashiba agi, Kishor tenüng ya 'Nirmal Hriday School, Beadon Street, Kolkata' aser 209-Karahgar Assembly Constituency (Part No. 767,

Serial No. 621), Bihar nung züngoksema lir. Bihar nung pa indang voter ID IUJ1323718 lir.

ECI-isa, Representation of the People Act, 1950 nung Section 17 kübok nisung ka constituency ka dak tema nung mezüngoksemtettsü ta shia lir, ta metetdaksüogo. Iba tetuyuba sülen manidakra kasa Act kübok Section 31 dak ajemdaker merenshitsü lateta lir.

"Nü tenüng constituency ka dak tema nung züngoksema aliba dak sendakba nung anogo asem tsüngda ken o jangjashitsütsü metetdaksür," ta ECI-i Kishore dangi yokba shiti nung shia lir.

Indian Express sangdong ajanga ashiba agi, Bihar nung Prashant Kishor ya Kargahar assembly constituency kübok Sasaram Parliamentary constituency nung voter ka ama züngoksema lir. Pa indang polling station ji Rohtas district kübok Madhya Vidyalay, Konar nung lir. Konar ya Kishor'er yimtsüng lir.

Temetettsü kaji Kishor ya

Bengal nung 2021 küm assembly election mapang Trinamool Congress indang political consultant ama inyak. Pa indang polling station ya B Ranishankari Lane nung St Helen School ta züngoksema lir.

Kishor indang team nungi züngsem tejen kati ashiba agi, Bengal assembly election sülen pa Bihar nung voter ka aküm. Par team züngsem yagisa, Kishor-i pa indang Bengal voter card thitsütsü atema apply süogo ta ashi.

Kasa mapang nung ward number 73 nungi local TMC councillor aser CM Mamata Banerjee tamo, Kajari Banerjee-i ashiba agi, 121, Kalighat Road ya All India Trinamool Congress indang party office lir. "Pa (Kishor) TMC nung inyakba mapang pai iba ki semdanga idakji anenzüka liasü. Pa iba tesem nung voter ka ama züngoksem asü masü ajibo ni mejangja," ta lai ashiba Indian Express sangdong ajangsa metetdaksü.

RJD-i MLA ana densema party nung inyaker 27 mintok

Patna, Mongputeni/ October 28 (Agencies): RJD-i Hombarnü tang MLA tinyakdak ana densema party nung inyaker 27 mintokogo. Party nungi mintokertem rongnung taoba mapang MLA tem aser women cell tekolakba Ritu Jaiswal nungera densema. Assembly election atongtsü lia item nisungtem yagi party anema inyaksangshiba atema mintokogo.

"Parnok ya party anema inyaksangshiba atema RJD primary membership nungi küm trok atema mintokogo," ta RJD Tir Mangani Lal Mandal-i Hombarnü nikongtsütsü official shiti ka ajanga metetdaksü.

Party nungi mintokertem rongnung sitting MLA Chhote Lal Rai aser Mohammad Kamran na densema lir. Rai ya Parsa menden nungi JDU

candidate ama shimogo, aser Kamran shiba Govindpur menden nungi MLA lir pabo meshim.

Maneni taoba mapang MLA Ram Prakash Mahto, Anil Sahani, Saroj Yadav, Ganesh Bharti aser Anil Yadav nungera mintokertem rongnung densema lir. Ritu Jaiswal ya RJD indang official candidate ama Parihar menden nungi tokteptsü.

Kasa mapang nung RJD nungi opposition indang CM candidate Tejashwi Yadav-i Hombarnü nikongtsütsü Facebook Live ajanga migrant tem shirnok Chhath puja atema kidangi aruogo, parnok dang election nung vote agütsüba sülenang aotsü mepeshia liasü. "Taruba Chhath tashi nungbo shinga Bihar nungi temang anepalutsü atema mesüra mapa

aser shisaluyim bushia aotsü nüngdak madoktsü ta ni tenangzükba agütsür," ta pai ashi.

Taoba deputy CM yagisa, benjung atema kidangi meyipa arurtem train nung mener arutsü atema tetsükdaksü aika adokba atema railway minister aitsüogo aser minister-i special train 12,000 anepalutsüogo ta ashiba ya tiluja jembia liasü.

"Item train tem kong ali? Bihar nungertem metsümshidak dena nokdaker train tem nung nongtepa mener senzütepbu nguogo. PM Modi aser pai aniba sorkari Bihar nungertem mezüngmeshiba atema tatok meshitsüla," ta pai ashi.

Tejashwi-isa, pa Brehostibarnü Congress MP Rahul Gandhi den külemi rally ka nung shilem agitsü, ta shiogo.

MCD menden 12 atema by-election November 30 nü agitsü

New Delhi, Mongputeni/ October 28 (Agencies): Municipal Corporation of Delhi (MCD) menden 12 atema by-election November 2 nü agitsü aser vote December 3 nü azüngtsü, ta State Election Commission (SEC)-i Mongolbarnü metetdaksü.

Councillor tem ya taküm assembly election nung adokba sülen menden 11 taziung aküm. Dwarka-B councillor, Kamaljeet Sehrawat ya taoba küm West Delhi nungi Parliament atema shima liasü.

Delhi nung February ita Bharatiya Janata Party (BJP)-i assembly election nung Aam Aadmi Party (AAP) tsükdaksüba sülen iba by-election ya mezüngbuba election tongtibang ka asütsü.

Election ya Shalimar Bagh-B, Greater Kailash, Ashok Vihar, Chandni Chowk, Chandni Mahal, Dwarka-B, Dichaon Kalan, Naraina, Sangam Vihar-A, Dakshin Puri, Mundka, aser Vinod Nagar menden atema agitsü. Menden tazüng rongnung general aser mekazüka aliba menden naprongla densema lir. Menden teku BJP aser menden asem AAP ket nung liasü.

SEC-i ashiba agi, by-election atema osang November 3 nü sangdongtsü. Candidate temi parnok nomination November 3 nungi 10 tashi nung benoktetsü aser candidature ya November 15 nü tashi nung agintettsü.

"Election agitsü aliba ward tem nung Model Code of Conduct ya tang nungi benoktsü aser election inyakyim metembang tashi benoka atatsü," ta SEC-isa metetdaksü.

MCD ya 2022 küm unification aser delimitation sülen municipal ward 250 küma lemsar lir. Iba küm election nung AAP-i MCD menden 134 akok. BJP-i menden 104 aser Congress-i menden ti koka liasü.

BJP-i taküm election kokogo aser Raja Iqbal mayor asütsü shimogo. AAP councillor tem telok kati Indraprastha Vikas Party kümteta liasü.

"Nomination ya atakzükja aliba mapang pei tata Returning Officer tem nem agütsütettsü aser Returning Officer temi renemer aliba polling station tem indang list Commission indang website nung enoktsüogo," ta SEC ketdangsür kati ashi.

Kasa mapang nung SEC-isa, election inyakyim atema mobile application (Nigam Chunav Delhi) ka amenokba metetdaksü. "Voter tem anisüngzük atema SEC-i lokti nung shitemang agi tangar memenepertem aser tientet rogotem (arishi küm 85 tema) atema digital facilities agütsür. Nigam Chunav Delhi mobile app ajanga voter temi election agiba anogo wheelchair ka, teyari mesüra parnoki anizüker minoktsütsü atema facility tem meshitettsü," ta SEC-i ashi.

Aluyimertem nem sen crore 8,000 agüjatokogo: CM Fadnavis

Mumbai, Mongputeni/ October 28 (Agencies): Maharashtra Chief Minister Devendra Fadnavis-i Mongolbarnü ashiba agi, sorkari state nung tzünglu aser tzümet süng agi akoksar aliba aluyimer lakh 40 nem sen crore 8,000 bo agüjatokogo.

State cabinet-i ano sen crore 11,000 agütsütsü agizükogo. State cabinet-i October 7 nü teyari sen crore 31,628 agütsütsü agizüker aliba nungi iba teyari ya agüja arudar.

"Tang tashi nung sorkari teyari agütsütsü sangdongba kübok DBT ajanga tang tashi nung sen crore 8,000 bo agüjatokogo. Sen ya aluyimer lakh 40 shi indang account-i yokogo. Tanü cabinet senden nung ano sen crore 11,000 agütsütsü agizükogo. Iba sen ya budget nung mali asünung iba ya special ken o ka ama agizükogo. Onoki iba sen ya taruba anogo 15 tsüngda aluyimertem account-i yoktsü shiogo," ta Chief Minister-i ashi.

CM Fadnavis-i ashiba agi, tesem kar nungbo sen tesadang dang agütsür lir.

"Onoki list ajak matai tinyakdak nung list agizüka inyaktsü telemtetba agiogo,

ibayongji kar metongjemi lir. Anungji NDRF sen agizük, saka sen 10,000 agütsüba magizüki alirtem kecha shisabulutsü mali. Kari ashiba agi parnoki sen 10,000 agizükogo saka hectares asem tashipur nem agütsütsü aliba teyari mangu. Hectar ana atema sen agizükertem nem tang tasembuba hectar atema-a sen agütsü tenzükogo," ta pai shisem.

CM Fadnavis-i ashiba agi, temsüa alirtem ka danga mezütoki sorkari anepaludar. Iba den bendenloksema temsüa malirtem keti senotsü maotsü atema jenjang tapet agiogo, ta paisa metetdaksü.

Pai ashiba agi, sen ya taruba anogo 15 nungi 20 tsüngda aluyimertem account atongtsü aser senotsü agi anünga mali.

CM-isa, relief package ajak senteper sen crore 31,628 aliba nungi crore 21,000 aluyimertem indang account-i indang indanga yoktsü, ta ashi.

Maneni CM-i ashiba agi, alu nungi adokba chiyongtsütem alizük tenzükba mapang sorkari aluyimertem züngoksem tenzükogo, ajita asünung dang parnok nem atakzükja aliba jenjang agütsütettsü.



TIR YIMYIM YIMOBILEM (EDITRIAL)

DIMAPUR WEDNESDAY, OCTOBER (MONGPUTENI) 29, 2025

Mozü tali achiba timtem

Tanga state-tem nung taila medical doctortem apuba osang angashi dang asen lima nunga, ano, taila doctor melia alitsü amai temulung melemi bilemer. Atangji, asen lima nunga Dimapur nung ita ishika jakdang taila doctor ka apuba osang asenoki angashiogo. Iba doctor-ba ya pa meyong mozü ki lapoka shiranger anepaluba dang masü saka par meyong mozü ayokdak pharmacy-sa tuluba liasü. Aji oda, Dimapur nung pharmacy aika liaka par pharmacy nung mozü alirtem nungtepbaji anepdang nungi aonung dokanji meshibang tashi angati mozü lemstüba rakteper amaisa angu. Ano, kasa taila doctor-sang nemjiang government mozü ki, district hospital nungbo tasü mang sensaa amshidaktsüba otsü asangsang asü olulu-ar mebentetka jembiba angashiogo. Ibaji bilemdang dang, asen lima nunga taila doctor-sang jagi zülutsüba mozü agi, aneptsü melen, nisung kwika temang aser taküm raksatsür alitsü ta sasasetta bilemer. Ano, taila doctor-sa masüyonga, ashiko, junga mazüng-memetetba doctor-tema alitsü akok, anungji item jagi tashidak tai putettsür nisung kwika taküm arishi temtoktsür asütsü (?) ta bilemer. Item shisabolutsübatemji dang masü saka ano kanga junga azüngba doctor-tema aika alitsü saka parnok rongnung karbo shiranger masü sen meimba doctor-tema alitsü akok, anungji item jagi operation magi nunga ajungtsüba ser nung operation agi nungang tajungba asütsü ta ashitsü akok, mesüra nünngdakba dang nungibo menügdakba mozütemang aika zülutsütsü akok. Aji oda, aiben Nagaland nung shilumanem tia ajururtem ajurutepea jembitepdang, Nagaland nungbo doctor-temi mozü tali zülutsür ta jembibasa angshir. Iba jagi tangalen oagi temang repranga taneptsü bushia senzüdang mozü tejang ka ana dang zülutsüra, iba jagibo temulung masür, kechiyong asenokibo mozü aika achi nung dang aneptsü amai bilemer. Aji oda, nisungi yangluba mozütem nung ya taneptsü dang masü saka temang shilem ka aneptsü mozü achidang kasa mozü jagi temang shilem tanga ka yirutsütsü ana nung lir. Aji oda, nguyanguchi anentsü atema 'pain killer' achi nung tango tayangjibo khen nung zep ta anentsü akok saka iba jagi temesen, tezüngjang aser temulungjangbo kanga mejungi yirutsütsü akok. Kasaji, tashidak aneptsü mozü 'anti-biotic' meshitak mesüra tali achiba ajangaa poknüngpokra raksatsütsü akok. Iba amaji shirangertem aika tashidak agi masü saka mozü meshitak mesüra tali achiba ajanga asübatema alitsü. Ibai nübortem asoshi kanga lendong mapatem lir, kechiyong taneptsü bushia ao ser nung, Tsüngremi agütsüba arishi atongba agi masü, saka sen arshia operation agidang mesüra mozü meshitak mesüra talila agütsüba agi tasü lendong ajurutsü ana nung dang lir. Aji oda, kuliji tapu aika agütsüyonga nisung süadokerbo kecha agia takümji meyipa bener marutettsü. Iba ama taneptsü bushiba maparen nung lendong aser takoksa mataloktsüsa nübortem rongnung tanishirtemi shisatokden sentong ayongzüka ajak nem tangatetba agütsütsü nüngdaker. Atangji, asenokbo medical azüngba ya government sen agi azünger asünungji angati azünger, saka tangarbo sen crore aika endoka azünger aser zünger külen pei meyong mozü ki lapoka inyaktsü atema ano sen crore aika endoka osettsüset alir, anungji item tazügdang endokba aser machine alidang endokba sen ajakji shirangertem dak nungi anguba sen agi menoktsü. Ibaji meteta asenok temang anepaludaktsüsbaji kanga tongtibang lir. Atangji, asen lima nunga government mozü kitem nung doctor tajung lir aser teyaria tajung angur, saka tashidak tulu anepalutettsü sabo nüngdak oset peria makaba mozü kitem dang lir, anungji sensakertembo anepalu mesütet timtem takoksa ajurur. Iba tiaji temeimtsüka lir. Aji meteta, asen lima nungbo shiranger anepalur doctor-temi mozü agi temang raksatsüsa masü saka mozü tajemtiba agi taneptsü angutsüsa shirangertem anepalutsü tangatetba, temulungtetba aser temeim lidaktsüner.

OLEMSABANG

SEN: KIBUR MASÜ KETDANGSÜR

~ Dr. Asangba Tzudir

Temeshi Laishiba nung sen ya kecha nunga tamajung ta rateta mali saka sen ya meimchir molunglemtetba tendangtsüba aser nüngdakba nung yaritsüba atema dang lir, saka ya meimchir sen madak Kibur masü.

Laishiba nungi angateter, ali rongsen tapu balala aser sen ya Tsüngrem meyong. Ya meimchir meyong masü mesüra kibur masü saka Tsüngremer sempet meimchiri teimi ketdangtsüba asen Tsüngrem tushia benschitsüba agütsüba lir.

Tenügsang Ken 24:1 ajanga iba alima nung meimchir meyong kecha mali ta angateter. Anungji, asen ket nung kechi aka - rongsen, sempet, aser maangka balala ajak asen nem ken asoshi ketdangtsü nungloktsüba dang lir, aser aseni koda ketdang süa benschir aji oda Tsüngrem matsügdang ketdangsür ka ama koda benschir aji langzütsü. Anungji karie danga pei sasa asentzü yima meranga inyaka ahzüka sen ji pa/la meyong ta bilemra Laishibai bo aji aitsütsü.

Mathi 25:14-30 nung sen mori agi O-entepba nung kiburi pa rongsen par kilirtem nem nungloktsüba indang shia angutsü. Kiburi sen mori junga ketdangsür dang, lanlia, tajung aser temolunglemtetba kilir ta ashi, saka kilir shibai tetsüba agi sen ji ali tur miima ayu pa dangbo tamajung aser azümesen kilir ta shia angutsü. Iba nungi angazüker, kodang Tsüngremi molungba ama amshidir, sen ahzüka aser amshiba ji tajung aser temeshi lir.

Anungji, Tsüngremi asen nem koba sen asen tenzüksü asoshi mesüra Tsüngremer wadang asoshi benschir item ajakji koda ketdangtsüba benschir aji oda Tsüngrem tsügdang kenü anogo langzütsü.

Rongsenji bendena ayutsüba masu saka renlokdkaja tangar-a moatsütsü atema lir. Yisui-a aiben dang meimchiri rongsen madak kibur akümba aser sen dak dang rangloker aliba indang tekümdangtsü indang shia lir. Shingaia Kibur ana metenzüktet. Mathi 6:24 nung yamai shia lir: "Nenoki Tsüngrem aser rongsen metenzüktet."

Asenoki senji ketdangasütsüla saka sen nem ketdang mesüdaktsütsü? la ta Laishiba nung ketdangtsüba ajanga maneni ashir. Kodang asen kapüh nung aliba senji Tsüngrem nungi anguba sempet shisa ka-a amshitsüba tangatetba masü asen meyong sen ta bilemdir asenok moruhmoru aser asükum lenmang nung ayaoker aser chichiba tekülem nungia pilar. Lai O nung ketdangtsüsbaji molungsoa agütsüba dak sendaka lir. 2 Korint 9:6-11 nung Paul-i yamai zülua lir: "Tsüngremi pelashishia agütsüba meimer" aser molungsoa agütsüba ajanga Tsüngrem nem tenügsang agütsüba dang masü tangar nem-a temoatsü agütsür.

Tangar nem agutsüba ajanga asen kecha mesamar, saka iba ajanga sen masü Tsüngremji asen rongsen lenmang ta jangjatsür. Yamaji, kodang asen akaba rongsen makamaiter den lemsatepdir shinga anüngaponga malitsü.

Anungji, temolunglemtet ketdangsür kati ochi nangri kanger meranga inyaka sen ahtsü. Yamaji, moruhmorua mesüra masüba nung sen meindoki shisa ka-a sen amshitsü. Tsübuba agi masü saka tarütsü nükla tajung yur sen bendentsü, aser molungsoa agutsüba ajanga tangar anepaluba den Tsüngrem yimli uludaktsür aser sentsüwangshir.

Anungji, Laishiba tsütsülen nungibo senji asen indang ama kibur akümtsüba masü, saka sen ya asen nem Tsüngremi Pa sen apuhtsüba (loan) lir. Au, senji aseni ochishia ahzüka asütsü akok, saka ya asen sasa molungdoka temeim mapa aser tenzüka mapa nung amshitsüla. Chichiba asen molungdokdakji asen akaba rongsenji masu saka asenok nem shibai moatsür Pa dak lir.

Anungji, kechi rongsen Tsüngremi asen nem ketdangtsütsü atema apuhtsür, asenokia shisa kaa ketdangtsütsü merangdi.

Asenoki, Tsüngremi molungba ama Pai apuhtsüba rongsen ketdang mesüteti lira tatok meshidi aser ochi shisatsu apuokjang ta shidi. Aji oda, Tsüngremi lanlia, tajung aser temolunglemtetba kilir ta ashitsüsa ketdang asütsü merangdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung tekülem ki indang signboard raksatsü

Korar, Mongputeni/Oct. 28 (Agencies): Kanker district kübok Korar nung Church of God meyong tekülem ki kimai October 26, 2025 nü nisung 40-50 shi nungpoka aita tamangba yimsü melendaktsüba anema yimyim ayima aroho indang ki o jen raksatsü. Aji masüandang police temi jelia tekum dangtsü shir liasü.

Progressive Christian Alliance (PCA) ajanga sangdong ka nung iba tatalokba ya aitsü aser iba telok ya yangji aliba Hindu organization den sendaktepa lir ta ashi. Tenük kuli alirtemi ashiba agi, nisung telok ka ya tekülem ki kimai "Ozüng alema tamangba yimsü melendaktsüba anenang" aser "Hindu telungjem teti alitsü" ta ayimtena liasü.

Arogo tenzüker kati ashiba agi, Bajrang Dal aser danga Hindutva telok temi police dang jelia parnoki iba arogo nem timtem agütsütsü sentong lir ta metetdaktsür liasü. Police temi Church of God indang in-charge, Pastor Komal Sahu dang tekum dangtsü ashi aser pastor dang tekülem sentong athitsü mesüra mapang melenshitsü shia liasü. Police temi iba osang agütsüba sülen Deobar sentong ya anepdang 9:00 ako nungi agia aliba mapang atsüzüka anepdang 7:00 ako nungi agi.

Nisung telok ya anüngdang 11:30 ako meta aru, aser iba mapang sentep temer liasü. Yangji aliba police temi parnok nokdang. Ajisüaka parnoki tekülem ki indang signboard atsüteta indoktsü.

Iba tatalokba asüngdangyatsü atema Pastor Sahu ya Korar Police Station-i

jaoka liasü. Police temi arogo ketdangsürtem dang ali kibur indang asüngdanger. Iba tekülem ki yanglua aliba ali ya tribal nisung ka meyong lir, shiba taoba mapang iba arogo nung pastor inyaka liasü. Pai iba ali ya angati agütsü aser yangji tekülem ki lidaktsütsü mulung, saka iba ali kibur tenüng pa yoka lir.

PCA ajanga police ketdangsür dang iba mapa tamajung inyaker nem tapet temerenshi agütsütsü aser arogo indang ki o jen, arogopur aser lenirtem kumzüka ayutsü aser security agütsütsü akhang. PCA-i iba tatalokba ya yimjung nung aliba tekülem ki nung tenük yokba lir aser India nunger senso ajunga nem tamangba yimsü temeden agüja aliba nung aibelenba lir ta ashir.

Tang tashi nisung kata pua mali aser police temia bushisüngdangba indang sangdong kecha agüja mali.

Taküm Kanker district nung Khristanpur anema mapa tamajung tali inyakba nung tang tesüsa atalokba ya shilem ka lir. International Christian Concern ajanga ashiba agi, October 5 nü yimtsüng 22 nungi nisung 400 dak tema adenshia Khristanpur tasü mang aremba temeden agienja tamangertem nem leper mamshidaktsütsü telemtetba agia liasü.

Kanker district kübok yimtsüng 12 nung gram sabha pangzüng ka agizüka lir, koba ajanga Khristan pastor tem, putir aser missionary tem arutsü memelar. Kudal, Junwani, Charbhatha, Nawadabari aser Sarona densema yimtsüng aika nung tekum dangtsü o züluba board

tem songa lir.

Iba district nung yimtsüng aika nung nüburtem tanaben tamangba yimsü melenshidaktsüba ataloka arur, kong Khristan kibong aika Hindu yimsü dangi tanaben meyipa arudaktsür.

August 3 nü Chhattisgarh indang Deputy Chief Minister Vijay Sharma-i Chhattisgarh Freedom of Religion Act, 1968 tashi itshitsü sorkar sentong lir ta sangdonga liasü.

August 10 nü Hindu nunger telok kati Havachur yimtsüng nung Khristan kibong ti nungib züngsem 36 merenshia amshi, shirnok Deobarnü tekülem kidang nungi meyipa shilanger liasü. Hindu nunger telok ya ki sema oa süng agi tamangertem dak azük. Nisung aika mozüki nung temang anepalutsüsa akum.

Tasüngji longkak aiter temi özüng alema tenzükbä tekülem ki tem agentsü densema Khristanpur anema mera agitsü aser leper mamshidaktsütsü sorkar nem takhangba agüja liasü.

Kasa district nung aliba Iradaha yimtsüng nunga 2024 küm August ita nisung 200 dak tema adenshia Khristan kibong 18 nem timtem agüja aser Katholi yimtsüng nung Khristan kibong 28 tanaben Hindu yimsü agizüktsü memulungba mechi parnok indang ki rongdoktsü.

2024 küm Chhattisgarh nung Khristanpur anema timtem agütsüba 150 tashi Evangelical Fellowship of India-i tejangja meteta lir, anungji India nung Khristanpur asoshi tamajungtiba state Uttar Pradesh sülen iba state ya akumer.

J&K nung police temi Khristan missionary anema FIR benok

Kathua, Mongputeni/Oct. 28 (Agencies): Jammu and Kashmir Police temi Kathua district nung tamangba yimsü melendaktsüba maparen inyak ta tai tonglokja mejangjaba Khristan missionary telok ka anema ken o ka benokogo. Missionary temi yimdaklirtem Khristan yimsü agizüktsü mesüzüka senotsü aser danga teyari agütsür ta Juthana yimtsüng nung alirtemi ashiba sülen iba mera ya agi.

Rajbagh police station nung Bharatiya Nyaya Sanhita indang sections balala kübok FIR ka benok, kong tamangba yimsü mezüngmeshia tamangertem jashidaktsütsü atema asaa mapa tamajung inyakba section 299 aser tsübodakja mapa inyakba aitsüba section 351(2) dena lir.

Kasa district nung yimdaklir temi Khristan missionary telok

ka dak teka sangshir anogo ishika lir iba ya atalok. Ajisüaka police temi telok ana ya sendaktepa ali asü maliar tang tashi osang agüja mali.

Tang tashi nisung kata pua mali. Kathua SSP Mohita Sharma-i kanga junga bushisüngdanga tapet temerenshi agütsütsü tuyuba sülen iba ken o ya benok ta ketdangsür temi ashi.

Brehostibar nikongdang missionary tem merenshiba atema yangji alir nisung kar anema FIR ka benoka lir. Missionary tem mena aliba gari ya yimdaklir temi anendaktsür süng agi gari ya züksatsüba sülen mangatetep adok, ta police-i ashir. Rajbagh Police Station nungi police telok ka oa iba tensa ya azüoka liasü.

Iba mepetmesü indang video ya social media nung prokshia liasü, kong police kar iba

mangatetep adokdang anasa nokdaka liasü saka paroki tensa mazüokba mechi sub-inspector ka densema police ti mapa nungi anenja lir.

Police temi iba tatalokba dak sendakba nung tai tonglokja alir ka pua lir, ta ketdangsür temi Hokulbarnü ashi. Tai tonglokja alirtem rongnung tanishir Ravindra Singh Thela aser pa den alirtem anema tamalena mapa tamajung inyakba ken o balala lir, ta ketdangsüri ashi.

Deobarnü Vishwa Hindu Parishad (VHP) teloki Kathua district nung tamangba yimsü melendaktsür ta tai tonglokja aliba mechi longkak aita liasü. Activists temi Khristan missionary tem merenshitsü akhang, shirnoki meta talang nung aliba yimtsüngtem nungi nüburtem tamangba yimsü melendaktsüba mapa inyaker ta aitsü.

ANOGO ABEN TSÜNGREM DEN

Külemtsü Renemba

Asen taribi merüktetter aser meshitetter ama pa amentsü aser Levi chirtem meshitettsü. Pai parnok hon aser taribi mesüka merüktettsütsü, anungji Kibuba asoshi parnok temeshiba nung tenla bener aruba nisungtem akümtsü. (Malaki 3:3)

Asen tekülemba ajungmajung mazüngi inyakba agi masü saka jakla dak nungi metettsü. Arogotemi ken tajung, ki tajung, sayutsüngir-i koda junga jembitetter iba ajonga tekülem ajungmajung bendanger; saka asen temulong telong nungi Tsüngrem den tesentaktep junga melira tanga ajakji yimsü sayisabong dang alitsü. Levi nungerji par mapang nung tekülem lennir liasü. Parnok mapaji nubur tenung nung tarongba tenla agütsürtem. Tsüngrem i ashi parnok tekülem tenla magütsüdang Hon aser taribi merüktetba ama tamasa meshitettsüla. Memerükba ajak mi agi ama rongdoktsü. Tenung agi dang yimsü mapa inyakba aser tenzükbaji temeshi Tsüngremi magizüker. Tanü aseni tema osettem nung rangloka külemer, saka shitakba tekülemji asen taküm telong nungi dang lir. Aseni asen tama Tsüngrem nem memeshitetdaktsüra, asen tekülemba nung Pa malitsü.Asenok mulongsentsü memerükra aseni tenla agüjaka Tsüngrem tsüngdang tagizüktettsü masütsü. Tekülemdak tenla ki nung atenba agi dangbo Tsüngrem den lungjemer ta ashitsü makok.Na tekülemdak temolong mesüi lira tanaga masü saka nü mulongjang tamasa reprangang aser Tsüngrem nem aji meshitetdakjang sura nai Pai mulongba ama jangratema temoatsü ngua külemtettsü.

Korean Catholic temi Halloween nung ajemsetba ochi bushir

Seoul, Mongputeni/Oct. 28 (Agencies): Halloween parnok asoshi sarasademtsü. Pai ketdangsür dang ochi mapang lanurtem timba sür temai adoktsütsü, kanga junga bushisüngdangtsü, aibelener nem ochi obendang agütsütsü aser tarutsü nung iba ama lendong majurutsüsa linük yangerba nung yaritsü ayongzüka liasü.

October 27 nü Itaewon Sorkari mapa shidak Square nung iba sentong agiba nung Catholic nunger timba sür jenti laluogo, ta Father Leo Ha Chun-soo-ia ashi.

Iba lendong timtem ajuru alir nem sorkari ochi obendang magütsütetba asoshi süngmanger, ta iba lendong nung asür Gabriella Shin Ae-jin tetsü Teresa Kim Nam-hee-i ashi.

Iba memorial mass meinprongtsü atema nisung kar ola tulu nung ken atemer, koba ajanga nisung meimchir dak taochi makaba sayur ta lai ashi. Asen nüburtem kati ka temulung shirangba asoshi aria bilemja teka amteper nisung takum mezüng südaktsüba ajanga dang Itaewon lendong ajanga temulung shirangba aser timtemba tatem kati arutsü imlar ta lai ashi.

Father Choi-i iba lendong ya "social disaster" lir ta ashi aser

AO OSHI ANGAZÜKDAK:**TANÜ ANGAZÜKTSÜBA OJANG****Tongdak**

(v) meshi nung chipo ayu (place pot on hearth)

* Aon asotsü atema ni aonpo tongdak.

Tongdang

(v) mangutsüsa noktang (partition, obscure light)

* Mepet agi anü tongdang.



Tir Yimyim

OLONG PAITEP # 7313

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7312 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi,
16. Sür.

NAI-A YA METETTER

Dubai World Trade Centre nung aliba Beautyworld Middle East ajanga Guinness World Record angutsü meranga liasü. Iba sentong asoshi GCC aser Lebanon nung barbers 48 adenshi aser parnoki ghonda ka nung tebur 190 kou mejeba anepalua liasü. Kou mejeber shia den stylist aser helper kaka dena yaritep. Iba sentong ya BeautyLive by Fresha-i STMNT Grooming den yaritepa ayongzük.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Meghalaya nung Oil India ajanga tetsür toilet 47 yanglutsütsü**Shillong, October 28, 2025**

(Agencies): Sorkar meyong Oil India Ltd (OIL)-i Meghalaya kübok Ri Bhoi district nung aliba school tem nung tetsür asoshi toilet facilities 47 yanglutsü

atema senotsü teyari agütsütsü.

October 24, 2025 nü OIL ketdangsürtem aser Ri Bhoi Deputy Commissioner Abhilash Baranwal nungeri MoU nung sign sütepogo.

Iba tenangzüktep kübok OIL-i tetsür kaketshirtem asoshi toilets balaka maliba school tem nem Rs 72 lakh shi agütsütsü lateta lir.

Taküm küm tetenzüklen Union Petroleum Minister Hardeep Singh Puri-i semdangdang school tem nung toilet infrastructure shitak maliba ajitetba sülen iba mapa inyaksü mulungtet ta DC Baranwal-i ashi.

District administration aser OIL külemi iba mapa inyakba reprangtsü aser CSR funds tim nung endoktsü. Iba maparen ya taküm December tashi nung tembangtsü imlar.

Zubeen Garg indang film 'Roi Roi Binale' nung tax magitsüla: Gaurav Gogoi**Guwahati, October 28, 2025**

(Agencies): Assam sorkari Zubeen Garg indang tatembangba film Roi Roi Binale nung tax magitsüla ta Gaurav Gogoi-i Assam Chief Minister Himanta Biswa Sarma dangi shidi ka zülüogo.

Gaurav ya Jorhat nungi Congress MP aser Lok Sabha nung Deputy Leader of the Congress Parliamentary Party lir.

"Zubeen Garg asüba ya Assam nunger asoshi takoksa ulura aser sensotemi asür Zubeen den tesentaktep takang

lir. Zubeen Garg indang senmang ya music aser cinema adena orr lir aser pai inyaka arudang Assamese oshi ajungket, artists aika ajungmeso aser linük sabangtem nung asen state maitsü ajungketa aru" ta Gaurav-i shidi nung shia lir.

Rajesh Bhuyan-i direct asüba Roi Roi Binale film ya October 31 nü sayatsü sentong lir. Iba atema state ajungalen "exceptional advance bookings" ajangshiogo aser iba ajanga nübortemi Zubeen'er senmang benjungnüba

tejangraba sayur ta paisa ashi.

State sorkari iba film ya Assam ajungalen tax-free kümdakjang aser iba ajanga nisung teimbai Zubeen indang tatembangba creative work reprangtetsü aser sendakteptsü. Iba ama mera ka ajanga Zubeen-i pa taküm piyong Assam sobaliba senmang ajungketa aru ta MP Gaurav-isa metetdaksü.

State sorkari iba temepishiba süoki ia bilema agizüktsü imlar ta paisa Assam CM Sarma dangi züluba shidi nung shia lir.

BTC nung terenlok mapatem atema Rs100 crore lemsüktsüogo**Guwahati, October 28, 2025**

(Agencies): Tawa tasen akümba Bodoland Territorial Council (BTC) sorkar indang Executive Council tanabuba menogo.

Chief Executive Member (CEM) Hagrama Mohilary-i anir BTC Secretariat nung Hombar nikongdang iba senden amen aser idangji Bodoland Territorial Region (BTR) nung ketdangsübaren, terenlok aser tarutsü policy planning onüktem lemsatöpogo.

BTC sorkar nung BJP executive members 2 aser

BTC Assembly nung Deputy Speaker jia BJP nungi shimtsü lemtetogo ta CEM Mohilary-i ashi.

"Asenoki BTC ya lenmang shitak nung anir onürabang 'Give and Take' policy sülen anidaksüla" ta paisa coalition partners longjema alitsü indang nenshia ashi.

BTC nung Assembly elections magidang temsüa aliba nübortem nem land pattas (ownership certificates) agütsütsü ta nangzüka liasü. Iba mapa atema council-i retired Mandals aser

Kanungos 29 anioktsü mulunga agizükogo. Land and Revenue Department nung staff peria maliba agi iba mapa inyaksüsa akümer ta Hagrama Mohilary-isa ashi.

Maneni, Mandal training agir aliba trained but unemployed youths 200 tashi patta distribution work nung yaritepdaksütsü ta paisa ashi.

BTC tesemtem nung terenlok mapatongtem inyaksü atema council-i Rs 100 crore lemsüktsüogo aser senotsü amshiba mita reprangtsü atema dedicated team ka tentetogo.



One Arunachal NGO-i December ita 3 buba Arunachal Fashion Week (AFW) - The Artisans' Movement 2025 agitsü osang metetdaksüogo. Interior Park, Lekhi, Naharlagun nung anogo 10 nü iba sentong agitsü aser 'Vocal for Local' o 'Viksit Arunachal' omentem den putepa weavers, artisans aser designers tashi itdaksütsü. Taküm designer lineup nung district aser kin balala nungi- Pura Aniya (Ziro), Osum Jerang (Kaying), Jyoti Dada (Tirap), Gimi Yamang (Kra-Dadi), Opet Litin (Upper Siang), aser Joram Nampi (Keyi Panyor) nunger dena lir. Parnok dak alia Leeza Bagra, Siang Yangada, Jumter Angu, Liya Elapra, aser Metam Veo nungeria shilem agitsü.

Taoba Japan ato kilonser Abe tepsetsangi tai nangzükogo



Tokyo, Mongputeni/Oct. 28 (Agencies): 2022 küm taoba Japan ato kilonser Shinzo Abe tepset ta tai tonglokja alisangi tai nangzükogo.

Mongulbarnü iba ken o tenzüka prosecutors temi zünga ashiba taitsuba ajunga pai inyak ta arishi küm 45 tain Tetsuya Yamagami-i nangzük.

Yamagami-i nisung tepset aser arms control laws nung aibelena teka agi yangluba hadir ka amshia Japan nung lenir mapa talangtiba inyaksang dak akha ta tai tonglokja liasü.

"Ajakji shidak lir," ta pai court dang ashi.

Japan anüolen Nara yimti nung July 8, 2022 nü election nübuyim sentong ka nung Abe o jembia lia akha. Iba tesem nung Yamagami ya apu.

Abe indang Liberal Democratic Party (LDP) ya

Unification Church den sendaktepa aliba ajanga temulung melemi alisang tejashi nung Japan taoba ato kilonser ya khaset.

Yamagami tetsüi sen 100 million yen (\$663,218) tenla agütsüba mechi pa ya iba South Korea nunger tamangba yimsü telok dang tashia liasü. Iba tenla yagi par kibong rongsenketzüng mejungi akum, ta Japanese media ajanga ashir.

Mapang talangka ashishitep aser aija aliba Unification Church, koba sülen anitaker dang Moonies ta ajar, iba arogo yagi süpokrem agi ta tai tonglokja aliba atema ketdangsertemi tenük kanga yoka arur.

Iba arogo nung Japan nunger züngsem ya senotsü aruba lenmang nung tongti shilem agir ama züngshir.

Abe khasetba sülen LDP ozüng yanglur 100 dak tema Unification Church den sendaktepa aliba indang temai adok, anungji nüburtemi ruling party bhukumba ajema akum.

Mongulbarnü mezüng court session agiba sülen ano taküm 17 ben jembitsü aser January 21 nü obendang agütsütsü sentong lir.

Iba ken o jembi tenzükba kasa anogo nung Abe indang tembar LDP lenir aser Ato Kilonser Sanae Takaichi aser United States Tir Donald Trump na Tokyo nung senden amen.

Abe, shibai Japan indang ato kilonser ama küm toku jungnüa inyak, pa tenüng ya tenaprongi tetshia liasü.

Mongulbarnü Akasaka Palace nung ajurutepba mapang Takaichi-i Trump nem Abe meyong golf putter aser danga golf memorabilia agüja liasü.

Pakistan-i Bangladesh nem Karachi rongnendak amshitsü melar

Islamabad, Mongputeni/Oct. 28 (Agencies): India aser Bangladesh tsüngta tesendaktep mejungi aliba mapang ka nung Islamabad-i Dhaka atsür arutsü maongka agia par (Bangladesh) osettsüset bendang lima nung ayoktsü atema par (Pakistan) indang Karachi Port amshitsü maongka agütsü. India-i ali lenmang ajunga ajanga Bangladesh nungi jute agi yangluba oset bener arua ayoktsü nokdang ita ana lir iba osang ya angazüker.

Islamabad-i Bangladesh nungi jute aser jute agi yangluba oset bener arutsü tejangraba lemsatepogo, anungji shishilempaba tesendaktep tashi itshitsü temaitsü sayur. Proposal tasenba kübok Karachi Port Trust (KPT) ya China aser Central Asian linüktem den Bangladesh shishilempaba indang 'gateway' ka ama alitsü.

Hombarnü Dhaka nung Pakistan-Bangladesh Joint Economic Commission (JEC) session toku buba amendang iba telemtetba ya renemogo - aser iba ama senden ya küm 20 nung mezüngbuba alitsü.

Linük anaprongi shishilempaba, investment aser tourism nung tesendaktep ulushitsü mulungtepogo, koba taoba ato kilonser Sheikh Hasina atsüngdokba sülen linük ana tsüngta tesendaktep tasen ka tenzüker asütsü. Linük ana tsüngta ketdangsürtem tawa semdangtepba ajanga Dhaka indang foreign policy

melenshiba sayur. Bangladesh ya Pakistan anema azüdokshia nüchiso meshia arur 1971 küm nüchiso angu, aser akhi mapang nungi India den tesendaktep tajung nung lia aru, shiri Dhaka nüchiso anguba nung tongti shilem agia liasü. Ajisüaka küm tetenzüklen kaketshir temi anir longkak aita Hasina sorkar laoba sülen Dhaka aser New Delhi tsüngta tesendaktep mejungi akum.

Bangladesh indang Chief Advisor Muhammad Yunus-i April ita Beijing semdangba mapang China dang Bangladesh nung par rongsenketzüng inyakyim ulushitsü ayongzükba ajanga mangatettep adoka liasü, kong India alinük agi muketbanger aliba northeastern region atema par linük ya tzüym nung kibur ta shia liasü.

Iba o yagi New Delhi jashi aser Ato Kilonser Narendra Modi sorkari Bangladesh den shishilempaba nung tenokdangba agütsü. Bangladesh nungi ali lenmang ajanga India-i bener aruba jute aser 'woven fabric products' ajunga nung tenokdangba agütsü aser aben-süoshi terenem aser yanglur aliba chiyongtsütem amala rongnendaki bener marutsü nokdang.

India-isa Nepal aser Bhutan dak alaka Middle East, Europe aser danga linüktemi osettsüset bener aoba nung amshitsü Bangladesh nem 'transhipment facility' agüja aliba agiena liasü.

China aser ASEAN na tsüngda free trade pact yanglushi

Kuala Lumpur, Mongputeni/October 28 (Agencies): China aser Southeast Asia linüktem indang ASEAN bloc na tsüngda Mongolbarnü free trade agreement tajungba kuma yanglushir aliba nung sign sütepogo. Tenangzüktepba nung the digital aser green economy aser tanga industry tasentem densema lir.

Züngsem 11 agi kümtetba Southeast Asia linüktem indang Association ya China asoshi shishilembaba tsütsü partner tulutiba lir, aser taoba küm item linüktem tsüngda ajak senteper USD billion 771 shishilembatepba ASEAN statistics ajanga sayuogo.

US tir Donald Trump-i aniba administration-i alima ajunga nung linük balala dang import tariff tali meshiba atema telangzüba agütsütsü atema China-i ASEAN den inyakyim tali tajungba kuma ajungkettsü atema merangdar. ASEAN linüktem indang gross domestic product ya USD trillion 3.8 lir, anungji parnok ya China atema shishilembaba tsütsü kanga tongtibanng lir.

economy ka ama jenjang yanglutsü meranger, ajisüaka linük tashi taittemi rare earths aser tanga tongtibanng mineral tem export asüba dak sendakba nung tenokdangba talila agütsüba atema China aija arudar.

ASEAN aser China na tsüngda free trade agreement 3.0 version ya bloc lenirtem Malaysia nung summit ka amenba mapang sign sütepogo. Iba summit nung Trump-ia Deobarnü shilem agia liasü.

A S E A N - C h i n a tenangzüktepba ajungketshitsü atema sensaksem ya 2022 küm November ita tenzük aser taküm May ita tembanga liasü. Mezüngbuba FTA ya 2010 küm benoka liasü.

"T e n a n g z ü k t e p b a yanglushiba ajanga shishilembaba tsütsü tetsükdaktsütem tajemba kümdaktsütsü, supply chain connectivity tashi itshidaktsütsü aser lenla balala nung terenlok atema maongka lapoktsütsü," ta Singapore Ato Kilonser Lawrence Wong-i ashi.

China-i taoba mapang, iba tenangzüktepba yangluba

ajanga, aluyimba, digital economy aser pharmaceuticals sector tem nung China aser ASEAN na tsüngda shishilembateptsü asoshi lenmang tesatempa lapoktsütsü ta shir liasü.

China aser ASEAN naprongl Regional Comprehensive Economic Partnership nung dena lir. Iba telok yagi alima nütsünyongsük asemi aser global gross domestic product shilem 30 shi ayimjemer. Malaysia nung RCEP summit ya Kuala Lumpur nung Hombarnü ayongzuka menogo, koba küm pongu tsüngda iba lokti tentet indang mezüngbuba senden liasü.

Regional trade cooperation nung China-i tongtibanng shilem agitetla, saka Beijing indang military inyakyim ajanga tetsükdaktsü adoker.

Hombarnü Philippine Tir Ferdinand Marcos Jr-i, South China Sea nung China inyakyim aitsüogo, kong linük ana tsüngda aiben mangatettep adoka arudar.

Marcos-i China aitsüba dak sendakba nung Beijing indang foreign office-i telangzüba

agüja, Manila-i parnok rongshiba ajanga iba mangatettep ya adoker, ta ashi.

China-i South China Sea ya timbaka parnok meyong ta ashir, aser iba ajanga Brunei, Indonesia, Malaysia, Philippines aser Vietnam indang exclusive economic zone tem nunga kongshir aser iba ajanga item linüktem den mapangshia mangatettep adoker. Tzüym nung asetkong aika raktepba ajanga ken o aika mebenteti mangatettep adoka arudar.

"Asenoki kati ka dak tamang kateptsü asoshi inyakyim akangshitsüla," ta Li-i Mongolbarnü ashi. "Asenoki South China Sea nung Code of Conduct dak sendakba nung sensaksem takaratiba nung süa ken o takok tashi tekaratiba nung bentettsü merangtsüla," ta paisha shisem.

Wong-isa, "South China Sea dak sendakba nung tebilemba balala adoktsüsa, saka asenok ajaki yimjung, teküzmükba kübok liner aser tzüym aser anüng nung kecha tenokdangba makai senzütepnar," ta ashi.

January ita Trump Tir akümba sülen China nunger

osettem nung tariff tali benokba ajanga China aser United States na tang shishilembaba tsütsü rara nung lir.

Trump-i tariff tali benokba ya parnok indang domestic industry tem kümzüka ayutsü atema ta Beijing-i shiogo aser kasa mapang nung parnoki minerals tongtibanngtem aser magnet shishilembaba azüoka arudar. China-i world's rare earths ya shilem 90 dak tema adokdaksür.

Hopta tatemi linük ana tenüng nung o katsürtem Kuala Lumpur nung ajurutepba sülen alima nung economy tulutiba ana tsüngda shishilembaba dak sendakba nung tangatettep ka dangi arur asütsü ta bilemer aser iba Hopta Trump aser China Tir Xi Jinping na Seoul nung ajurutepba mapang tenangzüktepba balala yangluba sangdongtsü imlar.

Trump-i Hombarn anepdang Malaysia toktsür aoba sülen China-i iba tesem nung shishilembaba tsütsü tesendaktep akangshitsü atema tali nongshidar aser open trade koda tongtibanng iba indang nenshia arudar.

Nagaland nung mezüngbuba state level Wushu Champ's asayadar



Kohima, Mongputeni/October 28 (TYO): Anogo ana asayatsü aliba mezüngbuba State Level Wushu Championship Mongolbarnü Pele Khezhe Indoor Stadium, D. Khel, Kohima nung tenzükogo.

Nagaland Wushu Association (NWA)-i ayongzükba asayamung ya Senior, Junior aser Sub-junior (Boys & Girls) asayartem atema lir.

Peren (26), Kohima (18), Zunheboto (12), Dimapur (12), Mokokchung (12), Mon (9), aser Phek (4) ta district tenet nungi asayar 93-i iba

asayamung nung shilem agidar, koba state nung martial arts asaya atema alizüng tongtibang ka tongtetba lir.

Asayamung lapokba sentong nung Nagaland Contractors' & Suppliers Union aser Nagaland Taekwondo Association Tir Pele Khezhe tetushi tejaoker liasü. Sentong nung o jembiba mapang pai, "tanü ya kanga tongtibang anogo ka lir. Tang mezüngbuba Nagaland nung State Level Wushu Championship ka asayar, aser nenok ajak iba nung shilem agia otsü tasen yanglur

rongnung densemogo," ta ashi.

Pai, asayamung nung shilem agirtem dang asayar ka ama yimayimpong azüoka aremzüka asayatsü ajungshiba den "asayamung nung shilem agi-i aruba kija agia na takoker ka kümogo," ta ashi.

Maneni Khezhe-i, asaya ajanga taremzü, teamwork angazükdaksür aser medemer tasena yimteter ta shia lanur asayartem dang, külaküponga masayatsü aser Nagaland nem konang tetushi bener arutsütsü ayongzükba liasü.

Sentong nungsa Assistant

Director, Youth Resources & Sports Libemo Jami-i, sentepa aliba lokti ajungshi aser iba asayamung ayongzükba atema NWA nem tenüsang agüja liasü.

Asayamung lapokba sentong ya NWA Vice President Neibou Sechu lenisüba nung agi aser CBCK Youth Director Deo Huprem-i Tsüngrem temoatsü meshizüka sarasadema liasü. NWA Technical Secretary aser

Nagaland nung mezüngbuba National Gold Medalist aser Wushu Discipline atema NIS Coach Gabriel Khamo-i anir iba asayamung salute sentong agi aser NWA General Secretary Vekhozo-i tepela o jembia liasü.

Iba asayamung ya Nagaland nung Wushu asaya ajungkettsü atema tongtibang jenjang ka agiba lir, aser iba ajanga state nung aliba lanurtem iba asaya asayatsü asoshi tejangraba aliba aser parnok sempet sayur.

India den Test asaya atema South Africa team sangdongogo

Mongputeni/October 28, 2025 (Agencies): India aser South Africa na Test asayamung tenzüksü hopta asem dang anunga lia Cricket South Africa (CSA)-i India nung iba asayamung atema asayar 15 tenüng sangdongogo. SA-i taküm Pakistan den asayaba team nungi asayartem kar dang melenshia liasü.

Taküm küm tetenzüklen Pakistan den asayaba team nungi asayar asem dang melenshia liasü. Captain Temba Bavuma lenisüba nung team maneni asayatsü, shiba yiruba ajanga taoba asayamung masayateti liasü. Off-spinner Prenelan Subrayen aser seamer David Beginham na meshim aser iba ajanga

Bavuma meyipa arutsü lenmang lapoktsüogo.

Asayar shimertemi team nung asayar tejen aser tasentem ajak meyoktepba shimogo. World Test Championship cycle tasenba nung junga asayatetsü nükjidong nung parnoki team shimogo.

Batter tem rongnung Aiden Markram, Ryan Rickelton, Tony de Zorzi, aser Zubayr Hamza aser lanur asayar Dewald Brevis nung densema lir. Dewald yagi kanga junga asaya-a asayar shimertemi pa format ajak atema shima arudar.

Kyle Verreynne wicketkeeper asütsü aser middle order nung Tristan

Stubbs-i teyari agütsütsü imlar.

All-round tem rongnung Wiaan Mulder, Corbin Bosch, aser Marco Jansen nung densema lir aser parnoki team liromedemdaksütsü imlar.

Kasa mapang nung bowler tem ya Kagiso Rabada-i anir asayatsü, kong Keshav Maharaj, Senuran Muthusamy, aser Simon Harmer nungera densema lir.

South Africa Test squad: Temba Bavuma (c), Aiden Markram, Ryan Rickelton, Kyle Verreynne, Dewald Brevis, Zubayr Hamza, Tony de Zorzi, Tristan Stubbs, Corbin Bosch, Wiaan Mulder, Marco Jansen, Kagiso Rabada, Keshav Maharaj, Senuran Muthusamy, Simon Harmer.

Shah & Diya nati otsü tasen ka yanglua WTT finals atema qualify süogo

Mongputeni/October 28, 2025 (Agencies): India nung table tennis asayar Manush Shah aser Diya Chitale nati otsü tasen ka yanglua tena ya WTT Finals atema qualify asüba India nung mezüngbuba tarep temeyoktep asayar kümogo.

Iba season-ending asayamung kong tebur aser tetsür kija asayar top 16 aser tarep temeyoktep asayar top seven (host wildcard ka densema) asayar, iba asayamung ya taküm Hong Kong nung December 10

nungi 14 tashi asayatsü. Taküm iba asayamung atema ajak senteper senpet USD million 1.3 agütsütsü.

Iba asayamung nung shilem agitsüpurtem ya WTT Series Finals Race rankings ajanga lemteter, koba WTT Star Contender Muscat (November 17-22) tashi nung asayaba dena sükshitsü. Shah aser Chitale na ya tang tarep temeyoktep asaya nung world No. 8 tarep lir aser tena ya iba asayamung atema officially qualify asüba pongububa tarep kümogo.

2025 küm tepeyong tenati kanga junga asaya-a table tennis asaya nung India atema alizüng tasen ka tongtettsüogo. Tenati taküm WTT Contender aser Star Contender asayamung aika nung kanga junga asayaogo.

Iba tongtibang asayamung atema tenati qualify sütetba ajanga alima nung table tennis asaya nung India-i alizüng tasen ka tongtetba sayuba dang masü iba asaya nung India ya tangar den toktepa asayatetba linük ka küma aoba sayur.

World Boxing Cup finals nung India nung asaya 20 asayatsü

Mongputeni/October 28, 2025 (Agencies): World Boxing Cup Finals 2025 Greater Noida kübok Shaheed Vijay Singh Pathik Sports Complex nung November 14 nungi 21 tashi asayatsü renema lir.

Iba asayamung nung Olympic medalist asem densema linük 18 nungi temaba jenjang nung asayaba boxer 140 dak temai shilem agitsü.

Iba asayamung atema India nung asayar 20 shimogo, kong asayar tejentem aser taoba World Boxing tetoktepbatem nung medal ngur alirtem densema lir.

India team nung tebur ter aser tetsür ter lir, kong taoba mapang World Champion Nikhat Zareen (51kg), reigning World Champion Jaismine Lamboria (57kg), reigning World Champion Minakshi (48kg), two-time Asian Champion Pooja Rani (80kg), taoba World Champion Saweety Boora (75kg), aser World Championship silver medalist Nupur Sheoran (80+kg) nung densema lir.

Tebur asayartem rongnung asayar tejen aser tasentem meyoktepa lir. Teburtem ya Hitesh (70kg) aser Abhinash Jamwal (65kg) nati anir asayatsü. Tenaprongla yagi taküm taoba World Boxing Cup stage tem nung medal nguogo.

Iba asayamung nung Paris

Olympic medalists asem; South Korea nungi Aeji Im aser Chinese Taipei nungi Wu Shih-Yi aser Chen Nien-Chin nungera asayatsü. Parnok den ano linük balala nungi World Boxing Championships aser World Cup gold medallist tem densema lir.

Asayamung indang jembiba mapang BFI Tir Ajay Singh-i, "World Boxing Cup Finals ayongzükba asayaba ya India atema nemadangtsü mapang ka lir, aser iba ajanga asenok koda renlokaogo aji sayur. Boxing asaya nung temaba jenjang nung aliba linüktem aser Olympic medallist tem anidena idaki toktepdaksütsü ya tetushi tulu ka dang masü saka iba asaya nung India-a powerhouse ka akümba sayur. Linük nungi asayartemi asayar tajungtibatem den toktepteter aser iba asayamung ajanga parnok nem parnok ajungba sayutsü atema sabang tajung ka agütsür," ta ashi.

India team nung ano tebur rongnungi Jadumani Singh (50kg), Pawan Bartwal (55kg), Sachin (60kg), Sumit (75kg), Lakshya Chahar (80kg), Jugnoo (85kg), Naveen Kumar (90kg), aser Narendra (90+kg) nung densema lir. Tetsürtem rongnung Preeti (54kg), Parveen (60kg), Neeraj Phogat (65kg), aser Arundhati Choudhary (70kg) nungera team nung züngoksemogo.

BILEMDANGANG

"Nü kija dang süaka ochi asoshiho tasü ita nokdakang."